



**CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E A FEDERACIÓN GALEGA DE PIRAGÜISMO POLA QUE SE OUTORGA A CONCESIÓN DO COMPLEXO NÁUTICO E CAMPO DE REGATAS DAVID CAL EN VERDUCIDO, PONTILLÓN DO CASTRO - PONTEVEDRA, A FAVOR DA FEDERACIÓN GALEGA DE PIRAGÜISMO.**

En Santiago de Compostela, a

**REUNIDOS**

Dunha parte, Diego Calvo Pouso, conselleiro de Presidencia, Xustiza e Deportes, en virtude do Decreto 44/2024, do 14 de abril, polo que se nomean os titulares das consellerías da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia.

Por outra parte José Alfredo Bea García, presidente da Federación Galega de Piragüismo con NIF G36040764, no seu nome e representación, en exercicio das facultades atribuídas para o efecto polos seus estatutos federativos.

As persoas reunidas actúan no exercicio dos seus cargos e, na representación que exercen, recoñécense capacidade para obrigarse nos termos do presente convenio e para o efecto

**EXPOÑEN**

Conforme ao artigo 27.22º do Estatuto de autonomía, a Comunidade Autónoma galega ostenta a competencia exclusiva para a promoción deportiva e a acertada utilización do tempo libre, competencia desenvolvida pola Lei 3/2012, de 2 de abril, do deporte de Galicia, correspondendo á Consellería de Presidencia, Xustiza e Deportes as competencias de elaboración, proposta e execución da política do goberno galego en materia de deportes, conforme ao establecido no Decreto 136/2024, do 20 de maio (DOG núm. 101 do 27 de maio de 2024).

No exercicio desta competencia, e no concreto ámbito das infraestruturas deportivas, a Xunta de Galicia proxectou e executou a obra de construción do Complexo Náutico e Campo de Regatas David Cal en Verducido, Pontillón do Castro - Pontevedra, co obxecto de destinarse á formación, preparación e especialización dos deportistas galegos da modalidade deportiva do piragüismo.

O artigo 51 da Lei 3/2012, do 2 de abril, do deporte de Galicia sinala, entre outros extremos, que as federacións deportivas son entidades privadas sen ánimo de lucro, con personalidade xurídica propia e plena capacidade de obrar, cuxo ámbito de actuación esténdese ao territorio da Comunidade Autónoma, que exercen, ademais das funcións propias do seu ámbito de actuación privada e en virtude da presente lei, as funcións delegadas que se recollen no artigo 56.4. Asemade, e en virtude do disposto no artigo 51.5 da mesma norma, soamente se pode recoñecer unha federación deportiva





por cada modalidade deportiva. O artigo 53.3 da mesma lei establece que as federacións deportivas galegas terán a consideración de entidade de utilidade pública.

Para o máis adecuado desenvolvemento dos procesos de aprendizaxe, tecnificación e rendemento deportivo en Galicia na modalidade deportiva de piragüismo, é necesario contar, no Complexo Náutico e Campo de Regatas, cunha fórmula de xestión e mantemento que optimice o seu máximo rendemento de uso, onde se garanta un contexto idóneo para o desenvolvemento dos deportistas no terreo deportivo, pedagóxico, técnico, e en xeral, de todas as condicións que inciden na mellora da práctica deportiva.

Así mesmo, faise necesario optimizar o centro en beneficio tamén doutras modalidades deportivas como a natación, o triatlón, a vela, e outros deportes náuticos olímpicos/paralímpicos ou non olímpicos/non paralímpicos, que poidan enriquecerse co uso desta instalación náutica en beneficio do crecemento e desenvolvemento do deporte en Galicia.

Para unha maior visibilidade e promoción do deporte galego dentro e fóra da nosa comunidade autónoma, precisase que este campo de regatas estea en perfecto estado, non soamente para o desenvolvemento da actividade deportiva e competicións deportivas autonómicas, senón como sede para albergar nela campionatos nacionais e internacionais en diferentes modalidades deportivas, impulsando o deporte galego e promovendo Galicia como destino deportivo.

O artigo 38 da Lei 6/2023, do 2 de novembro, do patrimonio da Comunidade Autónoma de Galicia prevé que o uso privativo dos bens de dominio público require o previo outorgamento dun título habilitante: concesión ou autorización. O artigo 40.1.b) da citada norma establece que cando a ocupación se efectúe con obras ou instalacións fixas ou por un prazo inicial superior a catro anos, estará suxeito a unha concesión.

O artigo 46.1 da Lei 6/2023 permite a posibilidade de adjudicar concesións de maneira directa nos supostos previstos no artigo 103.2 da citada norma. O artigo 103.2, letra b) establece como suposto de adjudicación directa cando quen o adquira sexa unha entidade sen ánimo de lucro, declarada de utilidade pública.

Pola súa banda, segundo o artigo 48.1 da Lei 6/2023, a competencia para outorgar autorizacións e concesións sobre bens e dereitos do patrimonio da Comunidade Autónoma de Galicia que non veña especificamente determinada por unha norma con rango de lei, correspóndelle á persoa titular da consellaría á que se encontren adscritos ou ao órgano unipersonal de goberno da entidade pública instrumental titular ou á que se encontren adscritos os bens ou dereitos.

O artigo 51 da Lei 3/2012, do 2 de abril, do deporte de Galicia sinala, entre outros extremos, que as federacións deportivas son entidades privadas sen ánimo de lucro, con personalidade xurídica propia e plena capacidade de obrar, cuxo ámbito de actuación esténdese ao territorio da Comunidade Autónoma, que exercen, ademais das funcións propias do seu ámbito de actuación privada e en virtude da presente lei, as funcións delegadas que se recollen no artigo 56.4. Asemade, e en virtude do disposto no artigo 51.5 da mesma norma, soamente se pode recoñecer unha federación deportiva





por cada modalidade deportiva. O artigo 53.3 da mesma lei establece que as federacións deportivas galegas terán a consideración de entidade de utilidade pública.

Para tal efecto, as partes subscriben o presente convenio que se suxeitará ás seguintes

## CLÁUSULAS

### Primeira.- Obxecto do convenio

O obxecto do presente convenio é establecer as condicións que regulan a concesión demanial que se outorga á Federación Galega de Piragüismo do Complexo Náutico e Campo de Regatas David Cal en Verducido, Pontillón do Castro – Pontevedra coa referencia catastral 002200200NH30E0001UD, cunha superficie de 16.920 m<sup>2</sup>.

A concesión directa outórgase de conformidade co artigo 46.1 da Lei 6/2023, do 2 de novembro, do patrimonio da Comunidade Autónoma de Galicia, en relación co artigo 103.2 letra b) por ser a federación deportiva unha entidade sen ánimo de lucro, declarada de utilidade pública.

### Segunda.- Finalidade do convenio

1. A finalidade do presente convenio é que a Federación Galega de Piragüismo obteña a concesión para que leve a cabo a xestión e o mantemento das instalacións, garantindo esta que as instalacións se manteñan en perfecto estado para desenvolver actividades deportivas, formativas, competicións ou eventos deportivos, principalmente na modalidade de piragüismo.

2. Asemade, deberase impulsar e favorecer o de uso das instalacións a favor das diferentes modalidades deportivas náuticas que puideran beneficiarse das características deste campo de regatas así como do resto da infraestrutura destas instalacións en beneficio do crecemento e desenvolvemento do deporte galego.

### Terceira.- Dereitos da Federación Galega de Piragüismo

A concesión da instalación a favor da Federación Galega de Piragüismo leva para esta os seguintes dereitos:

a) O uso do equipamento de titularidade da Xunta de Galicia que se atopa nas instalacións do Complexo Náutico e Campo de Regatas David Cal en Verducido, Pontillón do Castro – Pontevedra e aquel que se incorpore con posterioridade.

b) A realización dos trámites administrativos necesarios para o axeitado funcionamento da instalación e do equipamento do Complexo Náutico e Campo de Regatas David Cal en Verducido, Pontillón do Castro – Pontevedra propiedade da Xunta de Galicia (nomeadamente, a matriculación de embarcacións, contratos de auga, de electricidade e de telefonía, contratos de mantemento das diferentes instalacións, entre outros).





c) A organización de competicións e eventos deportivos de carácter autonómico, nacional ou internacional na modalidade de piragüismo.

d) O aluguer das instalacións do Complexo Náutico e Campo de Regatas David Cal en Verducido, Pontillón do Castro – Pontevedra para o desenvolvemento de competicións e eventos deportivos de carácter autonómico, nacional ou internacional noutras modalidades deportivas distintas do piragüismo, ou para o desenvolvemento de eventos da modalidade deportiva de piragüismo de carácter autonómico, nacional ou internacional desenvolvidos por terceiros, ou outros eventos ou actividades que se estimen oportunos.

Dito aluguer deberá ser autorizado pola Secretaría Xeral para o Deporte e terá como finalidade a compensación dos custos estimados polo concesionario derivados do uso da instalación.

e) O uso da instalación para a realización de actividades de formación, promoción, campus, congresos ou xornadas, previa autorización por parte do órgano superior competente en materia de deporte da Comunidade Autónoma de Galicia.

f) A situar a sede da Federación Galega de Piragüismo dentro de ditas instalacións co obxectivo de facilitar a xestión e mantemento da mesma.

g) A realizar campañas de publicidade de promoción deportiva a diferentes niveis nas instalacións obxecto desta concesión, sempre que se cumpra co establecido no manual corporativo da Secretaría Xeral para o Deporte.

#### **Cuarta.- Obrigas da Federación Galega de Piragüismo**

A concesión da instalación a favor da Federación Galega de Piragüismo leva para esta as seguintes obrigas:

a) A subscrición dunha póliza de seguro de responsabilidade civil que cubra os riscos fronte a terceiros inherentes ao uso da instalación e calquera outra responsabilidade contractual ou extra contractual derivada da mesma.

A Federación Galega de Piragüismo, antes da sinatura da póliza, dará traslado desta á Secretaría Xeral para o Deporte, quen deberá dar o visto e prace ás condicións da mesma.

b) A subscrición dunha póliza de seguro para a instalación e o material titularidade da Xunta que cubra os riscos de uso, danos e roubo por valor do inmovible.

A Federación Galega de Piragüismo, antes da sinatura da póliza, dará traslado desta á Secretaría Xeral para o Deporte, quen deberá dar o visto e prace ás condicións da mesma.

c) A xestión, conservación, defensa, mantemento, mellora e o bo uso dos bens adscritos á Consellería de Presidencia, Xustiza e Deportes, sen alterar a súa titularidade.





d) O pagamento dos gastos de uso, funcionamento, conservación, mantemento e calquera outro derivado da súa utilización, incluíndo impostos, taxas e demais tributos que se deriven do inmovible, así como os gastos das actividades que se desenvolvan no complexo que lle correspondan e os demais custos asociados ao uso do inmovible durante a vixencia da concesión, asumindo o pago do IBI do mesmo.

e) A utilización da instalación segundo a súa natureza e a entregala polo menos no estado no que se recibe, mantendo en bo estado de conservación o dominio público utilizado e as obras e instalacións.

f) A solicitude e obtención das licenzas, permisos e autorizacións que requira o uso da instalación e dos seus bens e das actividades que se desenvolvan no complexo.

g) A asunción da responsabilidade das actividades que se realicen na instalación, cumprindo coas obrigas de natureza laboral, civil, tributaria ou doutro tipo que poidan implicar, sen que supoña en ningún caso, relación directa ou subsidiaria coa Xunta de Galicia ou responsabilidade algunha para esta última.

h) A facer constar expresamente en toda a información ou documentación propia das actividades alí desenvolvidas a colaboración da Secretaría Xeral para o Deporte, acompañada do logo de "Deporte Galego".

A rotulación co logotipo deberá permanecer inalterada, non podendo inserirse ningún outro rótulo ou publicidade sen a autorización expresa por parte da Secretaría Xeral para o Deporte.

i) A inclusión, na páxina web da Federación Galega de Piragüismo, dun enlace ao Complexo Náutico e Campo de Regatas David Cal en Verducido, Pontillón do Castro – Pontevedra no que se informe dos usos, a normativa, programas, actividades, horario, de forma actualizada.

j) A permitir e facilitar á Secretaría Xeral para o Deporte o seguimento, control e inspección das actividades desenvolvidas nestas instalacións así como das actuacións derivadas da xestión e o mantemento.

k) A reservar un uso preferente á Secretaría Xeral para o Deporte para as actividades promovidas pola mesma ou mediante acordos con terceiros.

l) A reservar un número non inferior a 10 asentos no palco de presidencia ou lugar preferente en todos os eventos que se celebren na instalación para a Consellería de Presidencia, Xustiza e Deportes.

m) A incorporar no inventario do Complexo Náutico e Campo de Regatas David Cal en Verducido, Pontillón do Castro – Pontevedra todo o material (deportivo ou de equipamento) adquirido pola federación para a instalación deportiva.





n) A non ceder o uso dos bens nin do complexo sen a aprobación previa da Secretaría Xeral para o Deporte.

#### **Quinta.- Condicións da concesión da instalación**

1. A Federación Galega de Piragüismo xestionará o Complexo Náutico e Campo de Regatas David Cal en Verducido, Pontillón do Castro – Pontevedra aportando os medios necesarios, económicos, técnicos e humanos, para o óptimo desenvolvemento das actividades e programas que se celebren no centro.

A concesión ten carácter gratuíto posto que a xestión do presente convenio que se realizará pola federación de forma directa, ten un alcance deportivo e formativo e carácter gratuíto, sen prexuízo do establecido na cláusula Terceira, apartado d) deste convenio.

2. A Federación Galega de Piragüismo elaborará a normativa de uso da instalación e o regulamento de réxime interno e réxime de tarifas que deberá ser elevada á Comisión Mixta de Seguimento, con carácter previo á súa aprobación pola Secretaría Xeral para o Deporte.

3. A instalación poderá ser utilizada polos seguintes colectivos:

a. Deportistas dos programas de tecnificación, rendemento e elite da Federación Galega de Piragüismo.

b. Deportistas participantes en competicións deportivas oficiais.

c. Poboación escolar galega que participe en programas de promoción do piragüismo desenvolvidos pola Federación Galega de Piragüismo así como os participantes no programa de deporte escolar da Secretaría Xeral para o Deporte.

d. Clubs deportivos dados de alta na Federación Galega de Piragüismo.

4. Con previa solicitude e correspondente autorización por parte da Secretaría Xeral para o Deporte, a instalación poderá ser utilizada polos seguintes colectivos:

a. Deportistas dos programas de tecnificación, rendemento e elite da Federación Española de Piragüismo ou, de darse o caso, da Federación Española doutra modalidade deportiva cuxa práctica sexa compatible cos usos e infraestrutura desta instalación.

b. Federacións deportivas galegas, entidades ou deportistas doutras modalidades deportivas cuxa práctica sexa compatible cos usos e infraestrutura desta instalación.

c. Deportistas participantes en estancias de grupos de tecnificación, rendemento e elite doutras comunidades autónomas e países.





d. Alumnado dos cursos das formacións deportivas oficiais.

e. Calquera outro colectivo ou entidade que solicite o seu uso con fins públicos ou privados sempre que non sexa un risco para a instalación deportiva nin o seu entorno, se respecte o medio ambiente e non perturbe a actividade ordinaria a realizar en dita instalación.

5. As actuacións a realizar pola federación en virtude do presente convenio en ningún caso supoñen autorización para a realización de obras de adecuación, mellora, estruturais ou de calquera outro tipo no Complexo Náutico e Campo de Regatas David Cal en Verducido, Pontillón do Castro – Pontevedra.

No caso de que se pretenderan levar a cabo obras que superen as de mera conservación e reparación deberá solicitarse autorización previa á Consellería de Presidencia, Xustiza e Deportes quen valorará a súa oportunidade e necesidade e procederá no seu caso a autorizalas.

Á extinción da concesión, os espazos obxecto da mesma con todas as súas instalacións e obras, reverterán na Consellería de Presidencia, Xustiza e Deportes, sen que o concesionario teña dereito á percepción de contraprestación algunha pola reversión.

6. A presente concesión implica exclusivamente a realización de actividades de xestión, mantemento e organización de actividades ou eventos deportivos por parte da Federación Galega de Piragüismo sen que en ningún caso supoña cesión de titularidade da competencia nin dos elementos substantivos do seu exercicio.

7. A Consellería de Presidencia, Xustiza e Deportes resérvase as medidas que estime oportunas para a adecuada conservación do ben así como a facultade de inspeccionar a instalación e a actividade dos ocupantes, para garantir a súa efectiva aplicación.

8. A Federación Galega de Piragüismo non pode subrogar a terceiros os dereitos e obrigas asumidos nesta concesión.

9. A Federación Galega de Piragüismo elaborará anualmente un inventario da instalación indicando os usos do material e o estado do mesmo. Este inventario achegarao na Comisión de seguimento que se desenvolva no primeiro trimestre de cada ano.

10. No caso de incumprimento das obrigas impostas, estarase ao réxime sancionador previsto na Lei 6/2023, do 2 de novembro, do patrimonio da Comunidade Autónoma de Galicia,

11. O concesionario estará obrigado a abandonar e deixar libres e baleiros a disposición da Comunidade Autónoma, dentro do prazo, os bens obxecto de utilización, tendo esta Secretaría Xeral para o Deporte a potestade de acordar e executar o lanzamento.

12. En caso de extinción do título concesional, estarase ao disposto no artigo 57 da Lei Lei 6/2023, do 2 de novembro, do patrimonio da Comunidade Autónoma de Galicia,



En caso de rescate anticipado da concesión a Federación será indemnizada polos quebrantamentos materiais xurdidos pola extinción anticipada. O rescate deberá estar baseado nunha circunstancia sobrevida de interese público.

### **Sexta.- Comisión mixta de seguimento**

1. Á entrada en vigor desta concesión créase unha Comisión mixta de seguimento coa seguinte composición:

-2 persoas representantes da Secretaría Xeral para o Deporte nomeados pola persoa titular da mesma, dos que unha será o/a presidente/a e terá voto dirimente e a outra actuará como secretario/a.

-2 representantes da Federación Galega de Piragüismo, a persoa que ostente a presidencia da federación ou persoa en quen delegue e outra persoa designada por esa federación.

2. Correspóndelle a esta comisión, entre outras funcións:

a) O estudo e elevación da proposta de normativa de uso e o regulamento de réxime interno á Secretaría Xeral para o Deporte para a súa aprobación.

b) O seguimento do cumprimento das condicións de outorgamento da concesión pola Federación Galega de Piragüismo.

d) O estudo do inventario anual da instalación indicando os usos do material e o estado do mesmo.

e) O seguimento e avaliación anual do Plan director da instalación.

f) Aqueles asuntos que propoñan a Secretaría Xeral para o Deporte ou a Federación Galega de Piragüismo

3. Esta comisión reunirse no primeiro e no último trimestre do ano.

Asemade, poderá reunirse a instancias da Secretaría Xeral para o Deporte ou da Federación Galega de Piragüismo en calidade de xestora da instalación.

4. A Comisión mixta rexerase no seu funcionamento polas normas vixentes en materia de órganos colexiados.

5. As discrepancias que, elevadas para súa resolución, non sexan resoltas a satisfacción da parte que a formule, serán sometidas ao coñecemento da xurisdición contencioso-administrativa.





### Sétima.- Vixencia

1. A concesión outorgase por un período trinta (30) anos contados a partir da sinatura do documento administrativo de formalización da concesión, sen posibilidade de prórroga, de conformidade co artigo 46.3º da Lei 6/2023, do 2 de novembro do patrimonio da Comunidade Autónoma de Galicia. Son causa de extinción desta concesión as establecidas no artigo 55 da dita Lei.
2. Á extinción da concesión, o Complexo Náutico e o Campo de regatas coas súas instalacións e obras, reverterán á Consellería de Presidencia, Xustiza e Deportes, sen que o concesionario teña dereito á percepción de contraprestación ningunha pola reversión.
3. Unha vez transcorrido o prazo da concesión, o concesionario deberá abandonar e deixar libre e a disposición da Comunidade Autónoma as instalacións. En caso contrario, a Administración Autonómica terá a potestade de acordar e executar por si mesma o lanzamento.
4. En caso de rescate anticipado da concesión a Federación Galega de Piragüismo será indemnizada polos quebrantamentos materiais xurdidos pola extinción anticipada. O rescate deberá estar baseado nunha circunstancia sobrevida de interese público.
5. En calquera caso, será causa de extinción o incumprimento do contido do presente convenio ou da normativa vixente así como a renuncia expresa por calquera das partes, cunha antelación de tres meses.

### Oitava.-Publicidade do convenio

As partes asinantes manifestan o seu consentimento para que os datos persoais que constan neste convenio, así como o resto das especificacións contidas nel, poidan ser publicados no Portal da transparencia e goberno aberto e no Rexistro de Convenios da Xunta de Galicia.

### Novena.-Protección de datos

As partes asinantes virán obrigadas en materia de protección de datos a cumprir co Regulamento (UE) 2016/679 do Parlamento Europeo e do Consello, de 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos, na Lei Orgánica 3/2018, do 5 de decembro, de Protección de Datos Persoais e garantía dos dereitos dixitais) e demais disposicións vixentes sobre a materia.



### **Décima.- Natureza do convenio, réxime xurídico e xurisdición aplicable**

Este convenio é de natureza administrativa e consecuentemente, as cuestións litixiosas que xurdan na súa aplicación, interpretación e cumprimento serán competencia da xurisdición contencioso-administrativa.

A súa normativa específica está constituída basicamente pola Lei 6/2023, do 2 de novembro, do patrimonio da Comunidade Autónoma de Galicia e a súa normativa de desenvolvemento, as normas básicas da Lei 33/2003, do 3 de novembro, de patrimonio das Administracións Públicas e do seu regulamento aprobado por Real Decreto 1373/2009 e a Lei 3/2012, do 2 de abril, do deporte de Galicia.

Este convenio está suxeito ás obrigas de publicidade impostas polo artigo 15 da Lei 1/2016, do 18 de xaneiro, de transparencia e bo goberno.

En proba de conformidade asíñase este convenio no lugar e data arriba indicados.

O conselleiro de Presidencia, Xustiza e Deportes

O presidente da Federación Galega de

Piragüismo

Diego Calvo Pouso

José Alfredo Bea García

